

四庫全書

史部

欽定四庫全書

閩中理學淵源考卷四十八

廣平府知府李清馥撰

福清葉氏家世學派

福清在宋王信伯先生開河洛宗派厥後傳之綱山
陳氏亦之陳氏藻林氏希逸是此邦實文獻之區也
明代葉良時先生以師儒夙學啟迪後嗣為一代元
勲碩德其立論持躬誘掖後進蓋祖洛閩而確守鄉

先正之遺者明季彼時學術波靡文忠實負荷其責
其培植善類扶持正學與吾郡李文節何鏡山諸公
相往復實一時中流砥柱矣

贈公葉良時先生朝榮

葉朝榮字良時福清人應隆慶改元恩貢授九江通判
潔已卹民負逋畢登佐權闕秋毫不染免商緡無算臺
使者賢之令攝瑞昌今有疏河功再攝彭澤有修城功
擢知養利州築城建學鑿塘墾田暇則與諸生談說經

術州俗一新卒之日書卷數函衣裳數襲而已士民立
祠祀之生平淡薄勤苦惟讀書窮理為務四書五經性
理綱鑑默誦如流至老無一字遺忘尤精於詩自言吾
說詩不在文字於治亂興衰之故燦若指掌五經奧義
具在其中苟有用我舉此可行也四方執經者如雲所
著有詩經存固四書述訓芝堂藁行世子向高

通志
閩書

道南源委

文忠葉進卿先生向高

葉向高字進卿福清人朝榮子萬曆十一年進士選庶吉士授編修遷南京國子司業旋領祭酒事士類咸服二十六年召為左庶子充皇長子侍班官礦稅橫行民不堪命向高上疏引東漢西邸聚錢事為鑑不報尋擢南京禮部右侍郎久之改吏部再陳礦稅之害又請罷稅監高准語皆切至妖書獄興移書沈一貫力諫一貫不悅以故滯南京九年後一貫罷沈鯉亦去朱賡獨當國神宗命增閣臣三十五年擢禮部尚書兼東閣大學

士與王錫爵于慎行李廷機並命十一月向高入朝慎
行已先卒錫爵堅辭不出明年首輔賡卒次輔廷機為
人所論劾久杜門不入直向高遂獨相者八年當是時
神宗在位日久倦勤朝事多廢弛大寮或空署士大夫
推擇遷轉之命往往不下上下乖隔謫籍永錮邊餉靳
發廷臣部黨勢漸成而中貴人權稅開礦四出大為民
害向高用宿望居相位憂國奉公每事執爭劾忠蓋帝
心重向高禮貌優厚然其言大抵格不用所救正十二

三而已其大者鄭貴妃嬖生福王已受封久不之國而光宗日在危疑京師奸人王日乾與亡賴人孔學訟刑部因訐奏孔學受鄭貴妃旨咀咒聖母皇上擁戴福王謀害東宮向高聞之具密揭言貴妃賢明福王賢孝萬萬無此乃奸人所為當靜處之一為所動即中外紛擾其禍將大神宗初覽日乾疏拍案震怒沉吟曰有此大事如何閣臣無一言左右乃以向高揭進神宗始寬霽次日向高復勸無發此疏發則上驚聖母下怖東宮貴

妃福王皆不自安須速定福王之國吉期以息羣喙又
為宛轉撐拄承間勸行久之福王始之國皇太子益安
向高力也向高嘗上䟽言今天下必亂必危之道蓋有
數端而災傷寇盜物怪人妖不與焉廊廟空虛一也上
下否隔二也士大夫好勝喜爭三也多藏厚積必有悖
出之釁四也風聲氣習日趨日下莫可挽回五也非陛
下奮然振作簡任老成布列朝署取積年廢弛政事一
舉新之恐宗社之憂即在廟堂之上其言痛切神宗知

其忠愛不能行向高又言臣屢求去輒蒙恩諭留顧臣不在一身去留而在國家治亂今天下所在災傷死亡畿輔中州齊魯流移載道加中外空虛人才俱盡一旦禍作天下必不罪他人而專罪臣臣何可不去且陛下用臣則當行其言今章奏不發大僚不補起廢不行臣微誠不能上達留何益誠用臣言不徒糜臣身臣盍先朝露有餘幸矣上不省京師大水四方多奏水旱向高又言自閣臣至九卿臺省曹署皆空南都九卿亦止存

其二天下方面大吏去秋至今未嘗用一人今人心洶
洶思亂特未發耳陛下萬事俱不理以為天下長如此
臣恐一發不可收也上亦不省神宗在位四十年之春
向高以歷代帝王享國四十年以上者自三代迄今止
十君勸上力行新政因復以用人行政請亦不報向高
志不行無月不求去神宗輒優旨勉留向高復言臣進
退可置不問而百僚必不可盡空臺諫必不可盡廢諸
方巡按必不可不代中外離心輦轂肘腋間怨聲憤盈

禍幾不測臣方憂陛下孤危而陛下閉塞愈深務與臣下隔絕帷幄不得關其忠六曹不得舉其職舉天下無一可信之人臣恐自古聖帝明王無此法也四十二年二月皇太后崩向高乞歸益數章十餘上神宗勉從之加少師兼太子太師遣行人護歸向高在相位務調劑羣情輯和異同然其時黨論已大起未幾又爭李三才之事黨勢乃成向高嘗右東林時目為黨魁云向高歸里六年神宗崩光宗立特詔召還未幾熹宗立復賜勅

趣之屢辭不得命天啟元年十月還朝復為首輔熹宗
初政羣賢滿朝天下欣欣望治然熹宗不能辨忠佞魏
忠賢客氏漸竊威福時左都御史鄒元標副都御史馮
從吾以書院講學為兩給事所訐帝傳諭欲毀書院者
屢向高言講學之禁從古未有言者動謂宗室禍敗皆
由講學不思有宋盛時正以濂洛關閩講明學術比及
王淮韓侂胄陳賈輩始立偽學名目構陷朱熹諸賢而
宋祚遂終太祖設科取士一本宋儒成祖又令儒臣採

輯宋儒論學之書為性理大全頒行學宮二百六十餘年一道同風一切決裂防維之事皆有所忌憚而不敢為皇上何輕聽二臣之言而有道學之禁臣為執政而諸儒臣聯翩去國天下後世清議謂何且將與王淮輩同被惡名乞與元標從吾同去熹宗不許向高為人光明忠厚有德量好扶植善類再入相事冲主奄人逞煬竈奸時事日非向高亦稍利方為圓不能蹇直如神宗時然猶數有匡救其後都御史楊漣劾忠賢二十四大

罪向高謂事且決裂深以為非廷臣相繼抗章至數十
上或勸向高下其事可決勝也向高念忠賢未易除閣
臣從中挽回猶冀無大禍乃具奏稱朝廷寵待忠賢厚
盛滿難居宜解事權聽歸私第保全終始忠賢不悅猶
以外廷勢盛未敢加害其黨有導以興大獄者意遂決
內竊國柄日廷杖諸臣而向高以時事不可為求去決
矣上不得已從之加恩以行蓋此時求去之疏又先後
六十餘上也是為天啟五年向高既去韓爌朱國禎相

繼為首輔未久皆罷居政府者皆小人清流無所依倚
忠賢首誣殺漣光斗等次第戮辱貶削朝士之異己者
善類為之一空向高坦直夷易在朝不以城府待士大
夫所建言無非欲破士大夫黨比之習家居布衣徒步
與田夫樵牧相應答為文明白條暢遇佳山水意興勃
生神韻散朗一似神仙中人平生見講學之人皆空談
無實故絕口不道而心實嚮慕之嘗與鄒公元標言公
講學必講孔孟而余第講閻羅鄒問故向高曰不佞老

矣填溝壑日近若有欺君傷人害物等事於閻羅殿前對
勘不過皆不敢為鄒曰如此則何公之非孔孟也天啟六
年卒年六十有九崇禎初謚文忠

明史 閩書
明臣言行錄

通志

翁氏家世學派

按明季三山派系翁氏懋卿葉氏良時皆以正學倡
教啟佑後人其最表著者餘侯再考訂續補焉

運判翁懋卿先生興賢

翁興賢字懋卿侯官人萬歷初以貢司訓建陽歷延平

教授與諸生談經講業一稟宋儒傳註遷兩浙運判乞
歸著有易經理解十二卷 通志文苑

文簡翁兆震先生正春

翁正春字兆震侯官人父興賢以貢士起家建陽教諭
歷兩浙運判粹於易學正春久不得志於會場已謁授
龍溪教諭矣大比之年郡太守夢明歲狀元出龍溪勸
駕馬萬厯壬辰廷對第一明代狀元及第典史則曹公
鼎廣文則正春無兩也授翰林修撰分校會闈主試京

省得士最多歷官禮部尚書會都御史楊漣疏論嚴璫
魏忠賢正春率詹事府僚彈治之辭甚激烈璫矯旨切
責正春隨乞終養歸天啟末起原官尋卒崇禎初謚文
簡正春方毅嚴重不妄言笑與人談終日無一狎語為
人瞻麗典重朝端式其風采知其槩律君子也

閩書
通志

方汝典先生仲夔學派

方汝典先生仲夔

方仲夔字汝典侯官人勤修力學教授生徒同時有諸生

莊修字治三葉履春字端卿鄭大紳字近吾李時建字行甫趙鐸字孟覺何斌字德觀楊玉樹字承謨戴穆夫字古度孝廉鄧壽朋字戒從學博王叔俊字升之鄧景卿字叔表俱閩縣人諸生洪勳字孟功郭宗禹字不伐陳秉誠字心源俱侯官縣人皆積學砥行北面授經後多貴顯云

通志

天啟以後諸先生學派

副使曹能始先生學佺

曹學佺字能始侯官人弱冠舉萬曆二十三年進士授

戶部主事中察典調南京添注大理左寺正居冗散七年肆力於學累遷南京戶部郎中四川右叅政按察使蜀府燬於火估修資七十萬金學佺以宗藩條例却之又中察典議調天啟二年起廣西右叅議初挺擊獄興劉廷元輩主瘋癩學佺著野史紀畧直書事本末至六年秋學佺遷陝西副使未行而廷元附魏忠賢大幸乃劾學佺私撰野史淆亂國章遂削籍燬所鏤版巡按御史王政新以嘗薦學佺亦勒閒住廣西大吏揣學佺必

得重禍羈留以待已知忠賢無意殺之乃得釋還崇禎
初起廣西副使力辭不就家居二十年著書所居石倉
園中為石倉十二代詩選盛行於世子白字子章為經
生以經學名

明史

縣令林元圃先生先春

林先春字元圃閩縣人天啟五年進士令嘉善捐介自
持無一毫苟取任三年撫按交薦廉能擢科員丁艱歸
先是嘉善民顧朝衡以不孝聞先春捕治之朝衡脫身

至京師投權璫又因籍沒魏大中一案先春多忤權璫
意遂嗾其黨考功吏以死註冊服闋赴補知為所陷或
勸之自白先春不辨而歸先春居家聚徒講學布衣蔬
食杜門不出年八十餘終著有易象叅洪範孝經解孟
畧等書

通志

縣令黃維章先生文煥

黃文煥字維章永福人天啟五年進士為文淹博無涯
涖歷知海陽番禺山陽三縣皆有聲崇禎名試擢翰林

院編修時黃道周以論楊嗣昌陳新甲得罪逮問詞連
文煥遂與道周同下詔獄獄中箋註楚詞聽直八卷陶
詩析義二卷既釋獄乞身歸里著有四書詩經琅環毛
詩箋易釋書繹老莊註陶杜詩註秦漢文評漢詩審索

詩經考

通志

齊望子先生莊

齊莊字望子閩縣人居齊坑嗜學家貧為人夜舂手足
操作而置書其旁注視之遂通會曉悉無遺以五經為

諸生當萬厯末年閩中文體漸尚軋茁天啟初愈甚莊
原本六經不稍雜縱橫家言每出筆根極理要情文疊
然衡文者無不以國士相賞從游嘗數百人經指示輒
掇科第而去而莊栖遲窮巷自甘貧賤者三十年無幾
微無聊不平之况在其意中著有史論白湖集

新福州府志

舍人鄭敬生先生羽儀

鄭羽儀字敬生閩縣人崇禎十六年進士授中書舍人

典試粵中著有戴禮新旨行世

通志

進士嚴白海先生通

嚴通字白海福清人父蚤喪其母令負布縷帛行鬻市中民部鄭廷楫時為塾師一見異之令白其母就學後登崇禎癸未進士著有白漁集藍閣逸纂春秋箋十餘

卷通志

閩中理學淵源考卷四十八

欽定四庫全書

閩中理學淵源考卷四十九

廣平府知府李清馥撰

莆陽明初諸先生學派

按莆陽諸先正當明代開創之初吳公即膺選擢輔
導依日月之光其抱遺經而晦草澤者或秉鐸序庠
或師資閭里各著隱見之跡其風流及乎苗裔遠矣
茲錄其著者載于篇端

司業吳性傳先生源

吳源字性傳莆田人源蚤孤力學通經尤深於易惇禮好義洪武三年授興化府教授十三年以林廷綱薦召赴闕綱源門人也既召見首以得賢才敦教化養黎元為對時太祖方立四輔官兼太子賓客位列公侯都府之次源與杜敷龔敷李祐趙民望同膺其選太祖遊東苑命源與敷等應制聯句恩禮優洽尋以老乞歸明年上念源賢復賜詔召之曰朕選公侯子弟入國子學司

業員缺卿為朕一來講道授經無筋力之勞而有成就
後學之益亦儒者素志也源復赴京授司業未幾卒官

有文集二十卷莆陽名公事述二編

閩書

莆陽志

學正鄭用舟先生濟

鄭濟字用舟莆田人永樂六年鄉薦為儋州學正按彭
惠安公與郡守岳公書曰故學正鄭濟著書經大學中

庸講說至今學者遵之

彭惠安集

莆陽選舉志

教諭陳廷傑先生賢

陳賢字廷傑靖之後治春秋經結廬西山巖瀑間以耕
以學洪武末舉儒士為興化訓導秩滿遷南康教諭永
樂中召入館閣預修大典改任湖口致仕賢為人嚴毅
方直安貧好古其學以躬行為先雅志恤物勤心職事
及門弟子成就者衆號為古道先生湖人塑像於學沒
因以祀之泰和楊文貞士奇為表墓稱其士行可質於
神明蓋實錄云子淮以孝行稱

莆陽文獻

閩書

御史陳孔昭先生道潛

陳道潛字孔昭莆田人建文庚辰進士授給事中與楊文敏榮同修國史文敏時稱其學行又著有拙齋存稿永樂初謫判夷陵起監察御史預修性理大全諸書于時纂修諸儒即翰林春坊多不得預道潛行已恭慎學問該博故得在選時閩縣陳景著長樂陳全莆田黃約仲陳用亦皆預修

道南源委

教授曾先生景修

曾景修名生以字行莆田人學尚躬行好深沉之思持

辨博之論永樂間貢入太學歷官德安教授與諸生處
情同家人答問講解終日不倦出其門者才質高下各
有成立著大學中庸詳說

道南源委

布政吳思周先生繹思

吳繹思字思周莆田人天順元年進士令饒之德興遷
瑞州府同知俱有惠政陞惠州知府屬邑有巨蠹怙勢
虐民繹思以法繩之守禦軍政為上官所更張卒伍忿
其不便將為變繹思諭之禍福皆羅拜丁內艱起復除

潮州海寇竊發躬率吏民激以忠義遂殲之陞浙江參政尋轉右布政使繹思丰神秀整孝敬樂易接鄉隣子弟雖困倦未嘗不衣冠早以經學名及門多所造就若戶部尚書周經工部郎張憲都御史汪奎皆終身不忘其教云

莆陽文獻

閩書

教授鄭拙菴先生立

鄭立字克豫號拙菴莆田人彭惠安公撰墓志畧曰先生少沉潛穎敏善記過人長遊翁司訓長劉僉憲武之

門翁公優於史學劉公長於經義先生從之皆得其所傳古今事多通知於尚書講究精微大有造詣故製文字語新理到名輩讓之他經諸子亦時搜覽方先輩玘期之甚重正統甲子鄉薦授易州學正改六安州遷饒州教授所至與諸生共治經史情同一家歲丙子江西聘為同考官鑒裁惟謹若謝大韶羅應魁二殿元皆是科所取治書士也後乞老歸養疴數歲親朋過從談論不廢後學多私淑者壬寅六月卒先生氣宇峻整動止

矜嚴取與不苟交遊以類加以學問之充敦行之實主
學南北并善舉職士大夫無識不識交嘆為名師儒云

郡守王士俊先生偉

王偉字士俊第永樂十六年進士授大理寺評事陞雲
南府知府以仁厚為政夷民悅服常遇歲旱禱雨有應
兵部尚書王驥征麓川道經其郡美以聯句曰三旬亢
旱黎民悴一雨滂沱太守功鎮守雲南都督沐昂尤重
其為人及卒民哀慕之偉邃經學工文辭宣德正統間

莆諸老在翰林者凋謝已盡惟偉與陳會元中並以文

章擅重一時云

出景泰志

檢討黃先生約仲

黃約仲名守以字行少負才名永樂初開館徵天下名
儒應詔至京成祖試上林曉鶯詩天馬歌擢第一官翰
林典籍預修永樂大典四書五經及性理大全諸書書
成進檢討學士曾蔡胡儼更相引重珥筆西清扈從北伐
俱有著述在翰苑二十年疏乞終養約仲精楷法其詩

語意清婉得唐人門徑

莆田志

學士吳汝賢先生希賢

吳希賢字汝賢唐屯田員外郎祭之後希賢幼敏異精
毛氏經天順甲申進士改庶吉士時同年李東陽以敏
瞻稱希賢與之齋名授檢討預修英宗實錄有貴家子寇
姓者密以賄丐希賢致半詞於其父希賢拒之曰苟如
此他日何以見董狐於地下耶進修撰陞左春坊左諭
德南京翰林侍讀學士卒於官希賢性豪邁負奇氣於

人少許可兩考會試所得多俊偉士為文章意新語壯
有聽雨亭稿四卷曾孫三畏字曰寅嘉靖癸卯鄉薦授
寧海教諭擢嵎縣令縣故無城三畏始建議築之城成
而倭至竟不能犯遷廣信同知歸以子獻台贈江西左
布政使

莆田志

侍講陳時顯先生用

陳用字時顯永樂癸未鄉試第一辛卯進士選庶吉士
時行在開東館徵天下名儒纂修五經四書及性理大

全諸書用預焉書成授檢討歷侍講卒用為人質實醇厚
言動不苟身歿無嗣士類傷之

莆田志

御史丘恒吉先生天祐

丘天祐字恒吉成化辛丑進士授瑞安知縣改饒平下
車即訪陳獻章於白沙究性命之學縣時遭燬天祐經
營締構不以擾民有芝產於與人以為德政所致秩滿
召入授監察御史彈劾不避權貴威寧伯王越附汪直
啟釁榆林已褫爵矣復附李廣引復都御史總制三邊

又綰院篆天祐率同列抗疏極言之略曰爵賞予奪人主之操柄也公則治私則亂出於臺閣則為公出於近倖則為私忤旨廷杖六十下錦衣獄尋釋弗問又連劾廣恃權縱恣賍賄狼籍未報而清寧宮灾廣飲鴆死遂與給事中華泉共檢廣貲數十百萬疏籍沒之差按廣西又按南北畿郡故事江南葦場歲遣巨璫一人往覈實多賈怨病民天祐復疏止之由是葦場事權盡歸工部矣居臺九十三年以疾乞歸卒曾孫憲周萬曆乙酉

舉人文章行誼見重於時而厥施未竟人咸惜之

莆田志

教授李乾遂先生文利

李文利字乾遂元弟成化庚子鄉薦授桂陽教諭陞思南教授家傳理學行己清修著書有律呂元聲圖解蓋據呂氏春秋并隋志劉恕通鑑外紀所載伶倫制律三寸九分為黃鍾之宮因而詳加考證以三寸九分正司馬遷黃鍾九寸之誤以太極陰陽五行由一生二由少及多見黃鍾數少極清正宮聲為極濁之誤以左右對

待各得一百二十九分正三分損益上生下生至仲呂而窮之誤以正徵循環無窮正隔八相生往而不還之誤畫圖立說凡六卷揚月湖蘆稱其天授獨見門人范輅為序而刻傳之厥後有蔡于穀者字虞璧由歲貢入太學授湖廣行都司經歷修行積學博通古今在國子時禮曹鄭善夫疏薦其明習理數請召擢以正司天之謬不果用嘗輯開國事畧十卷有抄其稿者久而易名曰龍飛紀畧刊布人不知其出於穀也時論以於穀之

學與文利頡頏云

莆田志

參政陳三渠先生仁

陳仁字子居號三渠少從其從父兄翰林庶吉士邦瑞治書經多所通解任提學彥常按莆試士摘史命題時莆人專治經通史者尚少仁援據精博議論層出任公得之大驚成化癸卯發解第一丁未第二甲進士授戶部主事歷江西司郎中在部久明習條格部堂有大事輒與咨議洪洞韓公文尤倚任之屬陝西邊餉繁急因

奏調仁為陝西司郎中未幾逆璫劉瑾擅政深忌韓公
因摘其屬官細過仁坐降鈞州同知轉汝州知州遷南
京兵部員外郎掌武學事瑾誅擢浙江提學副使浙俗
喜生謗仁按試不以吏胥從手自披閱去取惟公士論
大服轉本省參政以疾乞休吏部奏言本官久歷中外
學行有聞例應加秩詔進本司右布政使准致仕命未
下而仁卒矣仁質重沉敏議論剛正嘗疏止給事中林
廷玉外謫追復御史彭程官闕里及禮部災條陳時弊

言多剴切政暇輒討習文事晚年造詣益深文章奧美
有機軸時譽歸之陳氏自邦瑞舉進士以經學擅名弟
邦器亦舉進士官至雲南副使仁之子懋舉鄉薦

布政黃汝器先生璉

黃璉字汝器別號求我第成化二年進士授南京戶科
給事中丁外艱服闋改南京禮科滿九載陞浙江布政
司右參議巡視溫處銀場弘治五年上慮各處銀場礦
脉或微或絕歲課未免取盈於民乃詔所司體究裁豁

凡官為是設者俱調別用璉於是改雲南其屬衛糧儲多衛僚攬之輸不以時巡撫大臣乃以屬璉因嚴設禁限禁驚者置之於法自是七八年逋負悉輸納轉貴州參政璉以其地夷獠雜居鎮以簡靜撫按交章以操履端方政事修舉薦之陞本司右布政使尋轉左屬普安夷叛朝命大臣率兵征勦特委璉總督糧儲璉處置有方饋餉賴以不乏賊平方將論功而璉以疾卒于官璉天性淳實且有量在浙時年勞當遷適巡按御史張文

意不滿於璉叙考有貶辭遂不果遷後璉在貴州文以
他事謫本司照磨璉不介意且薦其才於當道識者多
之所居里東南諸村落土田歲常苦旱璉乃白諸郡邑
發民鑿渠由金墩抵巖沁數里引木蘭延壽餘水溉之
遂變磽瘠為膏腴鄉人德之居官三十餘年不以生產
為念自奉極儉約死之日家無餘貲遺孤奔官所扶柩
歸未免稱貸於人庶幾清白之遺云 出府志

教諭茅常清先生陽

茅陽字常清仙遊人穎敏簡樸成化中以貢入京聞河
東閻氏禹錫得薛文清之傳遂往師之授新城訓導陞
河源教諭所至以師道自尊嘗疏時弊十條詞旨愷切
皆中旨施行所著有勉齋稿

閩中理學淵源考卷四十九

欽定四庫全書

閩中理學淵源考卷五十

廣平府知府李清馥撰

簡討黃行中先生壽生學派

按莆中諸名儒碩彥其問學大都不僅屑屑章句維時俗化樸茂諸公蓋承明初風氣之始者莆自艾軒先生開派以質行為先至季世節槩愈著宋元之際諸儒如存碩果然公其道以私淑諸人者所在講席

尚多故明代英才蔚起士風家法邇有師授今錄自
黃氏行中先生而下其派繁可攷者著於篇

簡討黃行中先生壽生

黃壽生字行中莆田人滔十五世孫壽生洪武末與兄
同舉鄉薦以親老求歸侍養水南諸賢率從之游若會
元陳中進士徐資用皆門下士也親終入太學永樂六
年再試京闈第一九年登進士選翰林庶吉士預修性
理大全諸書既成授簡討九載將滿考試禮闈得疾卒

壽生莊重孝友通史百家尤邃於詩莆之詩學以壽生
為初祖子子嘉亦以孝聞子嘉長子深次子仲昭見家

學 莆陽文獻 閩書

副郎陳舜用先生中

陳中字舜用莆田人永樂十八年鄉試第二明年會試
第一資性簡率才思豐贍文章健直類其為人正統初
自南京戶部主事就留史館預修文廟仁宗實錄成陞
本部員外郎滿九載無意榮宦遂致仕幽巷貧居吟咏

自樂公門闕節終身未嘗及之卒年八十三

縣令徐先生資用

徐資用莆田人永樂戊戌進士令揭陽博洽有才舉動
端謹興學訓士有良吏聲疾作辭歸與弟資茹講行禮
學以肅家教鄉人稱為二徐

吳時耕先生稔

吳稔字時耕水南人叔告之後性穎悟嘗賦廬山瀑布
詩有入雲聲作雨映地色涵秋之句初從黃檢討行中

學詩經復從廬縣尹質中學書經講習之下皆能逆意而解嘗試鄉闈不利遂不復應舉後進延以為師舉業詩課立為改定諸生以其學取科第者甚衆中年以知者兩薦為訓導以母老辭不就

僉事黃未軒先生仲昭

黃仲昭名潛以字行莆田人性端謹年十五六即有志正學舉成化二年進士與羅倫章懋賀欽莊景等同榜以名節相激勵逾年以庶吉士除編修與懋同官而景

官除檢討是冬命詞臣預撰明歲元夕烟花燈詩且
出舊製令擬述以進先生以其詞多鄙俚近俳優非儒
臣所宜為與同官章懋檢討莊杲共疏論之忤旨廷杖
於是先生調湘潭知縣懋臨武知縣杲桂陽州判官未
行明年正月刑科給事中毛弘等言三臣初出草茅敢
言直諫實盛世事乞復其職特旨改先生右評事懋南
京大理寺左評事杲南京行人司左司副蓋是時先生
除官纔四十日耳京師稱三君子而羅倫以編修論學

士李賢坐謫又通稱翰林四諫云先生氣岼屹立思致
安詳既改南大理清守執法連居父母憂却去葷酒不
離苦塊者四年遂辭疾乞休家居十年弘治元年以御
史姜浩薦起為江西提學僉事誨士先行檢而後文藝
以身倡率之宦家子弟未嘗假借識拔皆名士如羅欽
順劉玉汪偉陳鳳梧是也弘治丙辰再疏乞致仕先生
前後所居官不滿三考家居之日最久儒雅蘊藉為鄉
邦儀表嘗與陳獻章周翠渠往來議論凡聖賢一言一

行惟求踐履之實平生刻苦為學務究道德性命之原
羽翼程朱而精於校閱嘗辨易卦未濟春秋褒貶雅風
陞降及編次或問裁定通鑑証異書法咸有發明又刊
布冠婚喪祭之儀以示後學所修有八閩通志延平邵
武府南平縣志又與周瑛共修興化府志有未軒集若
干卷正德戊辰卒年七十有四學者稱未軒先生豐城
楊蘆採其學行入理學而子孫多以科第顯

閩書
陽文獻
譜

縣令林先生廷芳學派

按先生為宋林氏冲之之裔彭惠安公稱其負重望
為學者師攷志乘柯氏潛丘氏山其學徒也丘之派
有朱氏悌鄭氏繼今附識之

縣令林先生廷芳

林廷芳先世福清人父震徙居莆之橫塘廷芳永樂十
六年進士知新會縣罷歸敦樸能詩尤善選體柯殿元
潛早從之學姪祭天順元年進士終廣東僉事子敷成
化二年進士終韶州知府

少詹事柯竹巖先生潛

柯潛字孟時號竹巖莆田人弱冠領正統鄉薦當赴春
試未忍離親隨師入蓮峯僧舍講讀不輟景泰二年廷
對第一授翰林修撰益自淬勵學行日以進明年陞右
春坊右中允兼修撰預修歷代君鑒寰宇通志既成陞
司經局洗馬仍兼修撰英廟復辟授尚寶少卿兼職如
故憲廟嗣位以隨侍恩陞翰林院學士奉旨教習庶吉
士李東陽等一十八人纂修英宗實錄成化改元再奉

旨教習庶吉士林瀚等二十四人命掌翰林院印三年
實錄成陞詹事府少詹事兼翰林院學士四年命日侍
經筵講讀未幾丁父憂踰年復丁母憂詔起復為祭酒
疏乞終制服闋卒於家潛質貌俊偉容止雅飭文章妥
整有法詩尤清婉接人外若樂易而內實捐介鄰郡有
中貴人寵冠一時士大夫欲求薦拔者爭趨其門潛獨
不往供職之暇時偕二三知己覽勝賦詩襟度豁如至
於遇事感發言論侃侃在庶僚時已繫天下之望位日

通顯雖嘗以聖賢之學啟沃聖心平生蘊蓄未及少施於天下其歿也士大夫多傷之潛院中所構亭旁植二栢後進慕其風采謂之柯亭柯栢所著有竹巖稟玄孫維祺別見

閩書

莆田志

副使丘安重先生山

丘山字安重知瑞安縣捕治老猾豪置之法嚴禁溺女教以婚嫁之宜以革奢風以旌異擢監察御史奉勅清理兩廣軍政遠惡州郡無不身涉從容逮踐根究始卒

親與定奪軍民交口稱便巡按應天被璽書恤刑並寬
嚴得中獄無冤濫滿九載擢雲南按察副使致仕山少
慕元儒盧齊韓之為人諷其遺編甚習有所吟作類其
格調而興致尤遠雅妙書法刻石崖州大忠祠一時重
之子茂樸教諭德平嘗上革弊安民疏仕淳安知縣孫
茂中正德進士至河南右布政使凝重簡默蒞事詳慎
曾孫秉文從姪泰

閩中理學淵源考卷五十

欽定四庫全書

閩中理學淵源考卷五十一

廣平府知府李清馥撰

九牧林氏家世學派

貞肅林公俊曰林自矩軒

應成松湖

棟于野

慎齋

岡孫

玉井以辨子木以順三復

圭

世以道學名敬齋公宗莊重

古質而尤名經學遠邇及門往往榮顯仕天官卿尹

公是尤顯者按貞肅所叙此一派為九牧邵州公蘊

之後源流最夥曰三復諱圭者正學道風為時推首所指授弟子數十名輩皆一時偉望其餘端州公輩之後有林氏環林氏富林氏文林氏堯俞林氏雲同江陵公藻之後有林氏廷綱林氏澗林氏岳林氏大輅皆卓然鴻碩之彥典型表著可為世法者也今錄其要者載於篇端

教授林敬齋先生宗

林宗字存敬號敬齋德齋公子林自矩軒松湖于野慎

齋玉井子木三復世以道學名宗莊重古質而尤名經
學遠邇及門往往榮顯仕天官卿尹公旻尤顯者嘗發
解首為忌者所落後鄉薦授寧海學正改蘄州至揚州
教授以養老母公在官正身率物督士成材風為之盛
蘄祠之學主考山東王察使越尚浮藻宗務以理勝榜
稱得人寧海之歸無力北上揚歸始葺先祠故守量周
其三族晚得末疾孝敬不衰日數數省母母間不樂拳
跼請過悅然後起祠墓之祭扶拜匍匐淚油油下岳閭

老蒙泉為郡守廉其貧助以河南闕之地辭焉孫俊贊
曰于泮之濱于鳳之趾一脉東湖言世孫子經學垂聞
猶取淵委師嚴道尊名無虛士微祿逮親厥有繩軌歸
羅轍涸言活升水為周為辭義適彼已後償于天考祥
視履

林見素集撰敬齋公贊

襄敏林澹軒先生文

林文字恒簡號澹軒與環同出九牧葦之後宣德五年
廷對第三人授翰林院編修正統初預修宣廟實錄成

轉修撰景泰三年遷右春坊左諭德兼翰林院侍讀四年修歷代君鑒成七年修寰宇通志成陞庶子仍兼侍讀英宗復位罷景泰中宮僚改尚寶司卿仍兼侍讀時翰林應博學士者七人上疑其多兵部尚書陳汝言進曰唐有十八學士是不為多遂拜學士四年請老上諭李文達賢曰林文老成忠厚不可令去仍留供職八年憲廟登極褒進舊學遷太常寺少卿兼侍讀學士未幾復懇辭歸老學者稱為上林先生年八十七卒贈禮部

左侍郎謚襄敏文神觀清爽酬應安詳暮年神色安康
賓祭惟謹大小不慢人盡服其耆德黎文僖語彭惠安
曰翰苑中古意時流時時相半若林先生醇乎醇者也
李文達亦稱其德性堅確而不移氣質沉靜而不躁處
心平易操行潔修矍然若不勝衣而志不懾氣不餒其
為時推重如此曾孫渠希範元孫焜章

閩書

莆田志

簡討林子道先生大猷

林大猷字子道莆田人天順己卯鄉薦授新建教諭遷

國子學錄轉監丞再轉翰林簡討陞徵仕郎監丞如故
瞻博善考禮儀槩獲嚴而內冲晦懇款館中執經以五
六百輩齋舍至不能容輪番聽講又約日通集謂之普
講所以處諸生貧者授衣病者給藥死者躬詣哭殮或
屬其鄉人扶喪歸或捐俸以塋力弗能給又以疏告於
好義君子滿九載陞翰林簡討仍掌監丞事以疾卒官
大猷志行端謹學問該博獎與後進卒之日六館諸生
咸哀悼之林見素銘其墓謂其秩則卑而其品在彭惠

安陳康懿之間子夔戶部員外郎有雋才

閩書志

莆陽

貞肅林見素先生俊

林俊字待用福建莆田人成化十四年進士授刑部主事遷員外郎性侃直不隨俗浮沉事屬權貴尚書林聰輒屬俊治之陳獻章以薦至京日與講學大有所得時妖僧繼曉挾近倖梁芳以秘術進得被殊眷發內帑銀數十萬營建其寺俊疏極論之請斬繼曉而黜梁芳言甚激烈憲宗怒尋下詔獄加刑對益厲後府經歷張黻

上疏論救併下獄謫遠方俊得姚州判官時言路久塞二人直聲振海內王恕在留都疏乞還之以勵忠節會元日星變憲宗感悟叙復南部孝宗踐祚廷臣交薦之擢雲南按察副使俗崇釋信鬼鶴慶元化寺稱有活佛歲時士女會集動數萬爭以金泥其面俊按鶴慶命焚之得金數百鎰悉輸之官代民償逋毀邊方諸淫祠三百六十餘區所在學宮頽敝撤其材新之弘治四年用薦擢按察使調湖廣風儀整肅屬吏斂不敢犯會境內雨雪災異上疏觸時

忌引疾乞休歸已而言官交薦十三年拜南京右僉都御史操江正月朔陝西地震水涌上疏謂變不虛生必有其應述漢晉以來宮闈內寺柄臣之禍陳時政八事又請豫教皇儲因薦侍郎謝鐸少卿儲瓘楊庶致任副使曹時中堪居宮僚處士劉閔可布衣入侍東宮旋江西盜起勅俊巡視江西寧庶人貧譎伎害倍取祿米官校侵牟民利俊悉裁抑具奏乞斷大義特垂善處毋涉吳王几杖之賜叔段京鄙之求時濠雖橫逆萌未著或以為過後卒如所言人服其

先見云武宗即位起巡撫江西遭父憂不果正德四年
改撫四川時藍鄙之寇方劇至即宣布聖恩勦撫並行
屢以捷聞會誅劉瑾俊疏賀且言瑾雖誅權又在近倖
安知後無有如瑾者出請召用先朝舊臣劉健謝遷林
瀚王鏊等以修復舊政并請擇取宗室育之宮中用事
者滋不悅屬俊致仕許之命下朝論大駭科道交留不
果未幾而兩川之寇復作矣世宗在藩邸久知名及入
繼大統召起為刑部尚書未入覲上疏乞親近儒臣與

商可否以臻至治且言新詔之革所謂壞極而不得不革者也然貴近之臣或稱不便圖有變更未宜壞天下公議時近倖寔有有事者故疏及之既蒞任命侍經筵會暑罷講上疏言學貴緝熙禹惜分陰不宜輒罷屢上親大臣勤聖學闢異端疏太監崔文寵擅一時其私人李陽鳳犯法事下刑部文資緣內降改付鎮撫司問理俊據法執奏不遣有旨還送鎮撫司俊又奏言奉詔則違法守法則違詔臣能違詔不敢違法上怒雖不罪俊

而陽鳳乞改錦衣獄俊以不得其職乃上疏乞致仕章
八上乃允詔加太子太保給驛還鄉令有司給米與夫
歲時存問時嘉靖二年也俊嘗偕楊廷和數爭大禮
大禮議定得罪者或杖死四年秋俊即家上書言古者
鞭扑之刑辱之而已非欲糜爛其體膚而致之死也又
非所以加於士大夫也成化時臣及見廷杖二三臣率
容厚綿底衣重氈疊裹然且沉卧久乃得痊正德朝逆
瑾竊權始令去衣致末年多杖死臣又見成化弘治時

惟叛逆妖言刦盜下詔獄始命打問他犯但言送問而已今一槩打問亦非故事臣又見自去歲舊臣斥逐殆盡朝署為空乞聖明留念既去者禮致未去者慰留碩德重望如羅欽順王守仁呂柟魯鐸輩宜置左右臣衰病待盡無復他望不勝懇結不報又明年疾革復草遺表勸上懋學隆孝任賢納諫保躬導和且預辭身後卹典遂卒年七十六時嘉靖六年也後一年明倫大典成追論後附和廷和削其官其子達以士禮葬之後歷事

四朝抗辭敢諫以禮進退始終一節性簡儉好讀書慎
交遊接引後進惟恐不及士大夫論當世人物推俊於
韓范富歐間隆慶初復官贈少保謚貞肅

理學備考
通志 明史

閩書

閩中理學淵源考卷五十一

欽定四庫全書

閩中理學淵源考卷五十二

廣平府知府李清馥撰

林三復林綱齋顧在軒三先生學派

按林三復林綱齋顧在軒三先生皆當時宿望稽經核行具有師承澹軒本其家學又能師資有道詩禮龐厚之澤之所滙萃豈非草昧初開人文一時哉

教諭林三復先生圭

林圭字信玉又號三復學者稱三復先生曾祖棟與其父應成同登宋咸淳進士父師說蔭授縣尉圭洪武初薦明經為莆邑訓導陞寧國教諭永樂間應召修大典以老請賜冠帶致仕圭天性孝友元季兵亂相尋幼支門戶治堂從婚嫁又葬其父族七喪妻族四喪修其祖祠與高曾而下祖墓從父家大疫藥疾殞死無忌畏路遇疾者挈共載或偕舍館而食一布袍四十年正學道風為時推首凡六典文衡所指授殿元林環探花黃暘

庶吉士楊慈郎中顧孟喬數十名輩皆其弟子有三世
門下者圭治經有師法工古文詞達官至莆者必禮其
廬鄉後進多問業焉年九十四卒所著三復集幾百卷
百不存一宗孫俊贊曰龍起淮甸雲風景從卓彼鴻碩
為世儒宗藏聲處下一教始終完中粹行式其章縫維
道其南維易其東徂徠明復我公其逢

林見素集撰三
復公贊

侍講林綱齋先生環

林環字崇璧莆田人唐九牧葦之裔幼聰慧過人閱書

多成誦尤精伏氏經方在澤宮時文章已為人所重永樂四年廷試第一授翰林修撰明年陞侍講預修永樂大典兩考會試聲名籍甚十三年扈從巡幸卒於北京年四十環負材曉世務特為成祖所器一時儒碩亦厚重之沒無不悼惜焉所著有綱齋集二十二卷

教諭顧在軒先生文

顧文字在中別號在軒幼穎敏日記四五千言及長該貫經史時稱博學為文章簡朗秀整洪武中以儒士薦

為興化訓導秩滿遷教諭歷任將樂金華九江三邑典
文衡於江西湖廣皆名得士宣德初致仕正統間卒祭
酒李時勉為作小傳族子孟喬

參議黃澹軒先生常祖

黃常祖字邦經莆田人父震號梅東精易學為莆士師
常祖少習之始遊郡庠又從顧在軒林三復二先生治
尚書學復卒業殿元林綱齋之門修詞知名遠出流輩
永樂壬辰進士授刑部主事員外嘗有進天書者五日

不得報懼而自刎詔旨疑有他寃鞠其居停婦將抵死
常祖原實平反丁內艱服闋工部尚書吳中董營建奏
為其屬採木於山西湖廣時督促嚴急常祖為上為下
悉心殫智有周御史者共事不法入劾罷之事竣歸省
以楊文敏薦陞山西布政參議招徠流亡民悉復業平
陽界有盜聚千人為害推誠諭之皆降附尋致仕年八
十六卒彭韶志常祖墓言韶入郡學獲見前輩風致及
其時禮俗大槩老成樸素遠浮蕩驕奢之習時若會元

陳公舜用郡守方公廷訓鄭公季述及澹軒黃公皆朝野鉅望公於居室不增一椽尤謂舊俗繁重澹軒常祖號也

闕書

庶常楊惠叔先生慈

楊慈字惠叔少孤母鄭守節撫之性穎悟粹於經學永樂戊子鄉試第一明年會試第二辛卯廷對二甲第一選翰林庶吉士是年七月卒年才三十慈軀幹豐偉志氣軒昂恒以科第文詞為儒者末事人惜其早夭有文

集五卷

莆田志

郎中顧玉湖先生孟喬學派

按先生在當時遠近皆造門受業志稱其經學得傳及門多士今未得編考惟彭惠安公送先生之子文潛之任廣州序有曰某晚從顧先生受學則惠安亦曾經問業者今列之學派焉

郎中顧玉湖先生孟喬

顧孟喬莆田人正統七年進士引疾告歸善治經遠近

皆造門受業七年方赴廷試意在急流占官錄增年至
十餘歲授刑部主事改南京刑部郎致仕孟喬在官雖
處刑名錢穀不廢傳習經其指教多所成就若歷城太
宰尹公旻乃侍其先公閩中游宦日受業者士大夫咸
仰其善教云

閩書

彭惠安集

尚書彭從吾先生韶

彭韶字鳳儀莆田人天順元年進士授刑部主事成化
初為員外郎疏論僉都御史張岐末稱風紀請召用王

竑李秉葉盛忤旨下錦衣獄得釋尋進郎中外戚周或與畿內民爭田上使韶往勘韶歸劾奏之疏入詔以田歸民而責韶等方命復下詔獄科道官交章掾得釋當是時韶與何喬新同官並有重名一時稱何彭遷四川副使安岳扈氏焚滅劉姓一家二十一人定遠曹氏殺其兄一家十有二人皆以疑獄久淹韶一訊得實咸伏辜十一年陞本司按察使鎮守雲南太監錢能進金燈擾道路韶劾之不報十四年陞廣東左布政使疏薦陳

獻章於朝時朝廷屢遣中官採辦土物韶屢有陳奏復
以論太監梁芳事忤旨調貴州吏部尚書尹旻屢薦韶
可大用尋擢右副都御史巡撫蘇松嘉湖等處二十一
年以星變求言韶應詔陳言條上漸不見終四事言內
臣貢獻皇妃加於嫡后陛下褒賞其家幾與先帝后家
等一也內臣日增數至萬計利源兵柄盡付其手作奸
犯科一切不問二也四方貢物通番航海科擾百姓驚
動四夷三也六卿大臣並加師保諸寺監卿兼領高官

及其休去月廩歲輿徧施九鄙四也時已召為大理卿
及是疏上道改右副都御史巡撫順天等處兼整飭薊
北軍務韶復累有建白孝宗即位臣僚交薦韶與王恕
等人望所屬召為刑部右侍郎元年嘉興百戶陳輔為
亂陷府城大掠遁入太湖遣韶巡視韶追敗輔衆殲其
渠魁因劾罷守臣一人事遂定留治浙韶請鹽課有宿
逋者酌其年歲久近量蠲與減復減處州及泰順縣礦
課歲萬八百有奇事竣還朝圖進竈戶窮苦之狀凡八

復條陳六事戶部覆議通行為例從之明年轉吏部左侍郎與尚書王恕甄人才覈功實仕路為清其冬彗星見詔問羣臣時政得失軍民利病韶復疏言宦官太盛不可不早裁損又請午朝無循故事凡時政得失軍國重情乞令臣僚就御前面議取旨並見嘉納其年陞刑部尚書安遠侯柳景鎮守兩廣都御史秦紘發其贓以萬計有旨逮問詔抵景於法又皇親張巒瑩墳逾制韶皆抗疏極論但下所司而已韶蒞部三年昌言正色秉

節無私與王恕及喬新稱三大老而為貴戚近習所疾
大學士劉吉徐溥亦不善之韶志不能盡行連疏乞休
上勉留再三乃允命乘傳歸有司給月米歲夫如制明
年南京地震御史宗彛等言韶喬新張珍謝鐸陳獻章
章懋彭程俱宜召用不報又明年卒年六十六溥猶當
國僅予謚惠安贈太子少保韶平生孝友誠敬暮年名
德益尊正德初林俊為江西都御史為請謚因言臣聞
韶喬新少隸刑曹並名時選積官俱至尚書韶忠亮懿

醇喬新貞方恭慎儒術吏事兩所精究共學古人之清
同任天下之重韶沒贈謚備加仰見聖天子優寵至意
但文正忠節韶皆足當不審何取惠安之義不類韶平
生無以服世信後乞下議更謚事雖不行士論當焉韶
所著有國朝名臣贊及莆陽成都志政訓等書子濬舉
人族子甫

明史

通志

閩書

吾學編

行人方柳東先生澥學派

莆之名族如方如林英傑踵生載之志書傳為盛事

抑由累世績學敦行為有本歟然年代寔遠即師友
所漸遺緒亦寥寥莫攷方柳東先生以禮學著於時
號稱耆宿溯其家學尚矣

行人方柳東先生澣

方澣字源深莆田人宋仁岳之後正統四年進士授行
人年五十餘矣隱然老儒猶執經講說不已扣問者紛
如酬告罔倦平生尤邃禮學動止語默不少苟嘗嘆文
公家禮雖經諸儒註釋而去取或晦朝代遷改而冠服

不同於是作家禮旁附書首列圖而條析於下其高弟
柯潛嘗序行之未六十求致仕歸抱經困窮未嘗輕入
城府學者稱為柳東先生莆俗自水南徐資茹先生家
冠婚喪祭依約家禮至澣又篤是書鄉人多化之卒年
八十三孫岳有文名以南御史言事左遷秦州判官陞
常德府同知柯氏潛祭文畧曰猗歟先生吾儒之琛持
行純正積學宏深又曰考德問業邦人偕來時雨所化
罔不為才至於遐方亦沾膏馥瞻仰斗山委心而服年

餘八十進德彌隆俯仰無忤以壽考終

昔陽文獻閣書 柯竹巖集

朱體光先生煜學派

朱體光先生煜

朱煜字體光始育而聲啜及長自分不堪世用乃閉戶讀書以修身行善為事年十七輒為鄉人師少保翁世資學士吳希賢布政周瑛參議朱文環副使丘山僉事楊琅皆出其門里嘗有疑獄太守潘本愚以書請曰先生盛德厭人心願得一言而決煜陳說無隱情潘守深

然之繼復有請竟以疾辭後二子愷悌俱進士煜累贈

南京戶部郎中

莆田志

少傅翁資甫先生世資

翁世資字資甫父瑛翰林檢討掌國子助教事樂易喜
酒姻黨皆親資舉進士授戶部主事政暇輒繙閱舊案
究其利弊涉獵廣記因而明習典故條例因革悉所諳
練大為部堂諸卿佐所重丁外艱歸景泰改元尚書金
濂奏起復之固辭終制服闋復除舊官遂委典各司章

奏未幾陞署郎中適江南水災屬世資勘驗因奏免應
天太平寧國安慶廬州等府及建陽宣城等衛稅糧五
十萬餘石芻束倍之且檄所司賑恤英宗復位之元年
大臣多罷上識世資可大用遂擢工部右侍郎三年內
織染局言蘇抗五府織造上供丈綺七千疋未就合別
遣督又賞賜不足宜加造七千疋世資謂東南水潦民
苦艱食朝廷宜搏節之因與尚書趙榮左侍郎霍瑄議
減其半榮瑄皆有難色世資曰倘得罪某請以父子三

人當之疏請上疑其要譽推主議者下世資錦衣獄貶
知衡州至則決疑獄新廟學修石鼓書院立便民倉百
廢具舉衡衛帥有戾法者世資稍抑之遂誣其怨望逮
至京上不直衛帥復世資官成化元年陞江西布政使
適廣東寇發王師南下有議令江西轉餉計非用十萬
人不可世資令齎銀就廣東糴之且為奏蠲民賦百七
十餘石五年陞都察院右副都御史巡撫山東明年秋
東土大饑發廩勸分遣官賑恤八年遷戶部侍郎十三

年奉勅總督京通等處倉場明年進本部尚書世資以處計司出入劑量懸合事宜以年及請老加太子少保給驛歸有司給月米歲夫賜勅曰朕聞羲易繫終吉之辭禮經明進退之節卿累疏求去蓋得節於禮經朕既允而復陞者亦欲錫卿終吉之福君臣上下不各盡與卿歸其篤念乎此優游田里化導鄉人俾後賢觀法風俗淳厚則足副朕眷遇之懷時人榮之卒贈太子少傅世資居官四十餘年謙約和厚善兄弟廣交遊家無餘

贊兄世用貴州參議居官廉慎世用子澐令太和御史
有事於縣澐持不可坐免歸

閩書

僉事楊朝重先生琅

楊琅字朝重舉天順鄉試第一登進士授監察御史憲
廟登極詔書停罷鎮守內臣中外欣悅既改元有貢獻
希復者琅極言內臣不可預政倖門不可輕啓復與陳
恭愍選論劾兵部尚書馬昂翰林學士倪謙請起兵部
尚書王竑召還給事中王徽修撰羅倫等俱不報時號

敢言御史出按江浙二藩靜重不苛擢山東按察僉事
提調學政適歲歉癘疫大作巡撫大臣以地廣民饑命
琅與藩臬分道出賑琅精心受事行至東阿染疾既革
自起更衣冠端坐舟中乃卒諸生哀感醵賻以歸琅居
家孝友在官端介篤學善文無工書法從子國本

閩書

閩中理學淵源考卷五十二

欽定四庫全書

史部

閩中理學淵源考卷五十三至
八

詳校官編修臣謝振定

刑部郎中臣許兆椿覆勘

總校官原任中允臣王燕緒

校對官中書臣田尹衡

謄錄監生臣何永濤

欽定四庫全書

閩中理學淵源考卷五十三

廣平府知府李清馥撰

布政周翠渠先生瑛學派

莆中先正綽有典型攷公同時有彭從吾黃未軒諸
公論學切磋皆負一時之望讀公題嘉魚李氏大厓
義學記語夫功夫次第而箴砭後學共師白沙之失
前輩持守之嚴可見矣再按公生漳之鎮海早歲淵

源授受皆得之布衣陳公故其所學所守醇然洛閩
派的焉

布政周翠渠先生瑛

周瑛字梁石其先莆人父洪武間自莆田調戍於漳浦
之鎮海衛因家焉惟時衛所雖建而學校未興瑛由邑
學生領正統癸酉鄉薦不第乃博覽羣籍鈎深探賸成
化己丑成進士知廣德州興文教絕淫祠嚴生女不舉
者之禁陞南禮部郎中出為撫州知府調改鎮遠府秩

滿歸省弘治初王端毅恕為吏部即家起四川參政尋
轉右布政使丁內艱除服乞致仕給事中楊廉吳世中
交薦其學行起用竟弗赴瑛未第時受學於陳布衣真
晟尊嚮而篤信之及舉進士與新會陳白沙遼左賀克
恭上下議論然瑛以居敬窮理為鵠白沙之學有所不
契寓書李大厓承箕以辨之曰某聞人心無外為有外
者非也聖人靜有以立天下之大本動有以行天下之
達道由體及用一以貫之其餘為學皆由博以及約博

者萬殊也約者一本也求諸萬殊而後一本可得一本
既得則所謂萬殊者亦可推此以貫之矣某請得以言
其功程次第蓋始學之要以收放心為先務收放心居
敬是也居敬則心存聰明睿智皆由此出然後可以窮
理所謂窮理者非謂靜守此心而理自見也蓋亦推之
以極其至焉耳孟子曰萬物皆備於我此言人心無外
也不即物以窮理其能盡此心之體乎故自性情之微
以及形骸之粗自食息之末以及綱常之大自然六經之

奧以及天地萬物之廣皆不可不求其理求其理謂求其自然與其當然又於自然當然求其所以然積累既多自然融會貫通而於一本者亦自得之矣一本固非學者所易言然聞之中庸有曰喜怒哀樂之未發謂之中又曰上天之載無聲無臭至矣此譬如穀種雖自塊然而根苗花實皆聚於此又如雞卵雖自渾然而羽毛觜角皆具於此及其發見於行事在聖人體用一貫在學者未免差互蓋在己者有所拘蔽故所發不無偏重

之殊在外者有所搖奪故所施不無遷就之異然而既見本源則於處善亦安循理亦樂至於患難事變雖以死易生亦甘心為之此聖賢之大畧也今不務此乃塊然靜坐求畢體用之學吾見其難矣瑛自得第後歸於莆所著有經世管鑰律呂管鑰字書纂要翠渠類藁廣德志蜀志漳志等編嘗與黃仲昭同修府志議論間有不合自謂莆陽物史云卒年八十九學者稱為翠渠先生

縣令鄭文坡先生表

鄭衷字世和龍溪人自幼向上學務踐履嘗游周翠渠
瑛之門每見稱許事父及繼母以孝聞丁繼母憂念喪
母年幼追服三年正德癸酉鄉舉令南康作興學校俸
給外一毫不取以不善事上官謫廣德州學正提學顧
陽和薦其古行古心與世殊調轉揚州教授陞武陵令
致仕歸晚益嗜學築精舍於文山之坡鄉人稱文坡先

生

閩書 郡志

縣令施近甫先生仁

施仁字近甫龍溪人少以聖賢自期博洽善屬文顧舉業非其好也同邑林魁一見奇之弱冠負笈遊莆者三載於黃未軒周翠渠諸先生靡不論世尚友歸而躬行孝弟父母兄弟間動相規切期論諸道與同時潘鳴時高則賢潘桂芳周一陽稱五賢當道如沈寵周賢宣姜寶廷致書院以訓多士嘉靖丙寅選貢北上復與貢安國參証異聞選授紹興司訓王龍溪畿其邑人也時過

從論說宗良知之旨已轉諭建安與諸士會水西觀以
實修相砥所梓有建安興學錄復古議太上感應篇八
事圖說無非誘翼人心還古之道用薦擢龍門知縣政
尚清簡懸趙清獻遺像於退食之堂焚香告之曰倘有
負心願公示譴暇與諸生講論不輟自縣治至村落並
開立社學鄉約課督曉解改東莞以內艱歸不復出四
壁恬然坐次左右經史矻矻誦讀倦則正襟危坐凝神
定慮與友人談道外無他營其接引後學提闢啟鑰心

口無留隱焉年八十九卒所著有修正要語及諸詩文
多根極理要之言姪三畏任教諭好古力行家庭間自

相師友云

聞書

郡志

僉事宋立齋先生端儀

宋端儀字孔時莆田人幼嘗侍父助教公校文江右時
御史天台陳選監場屋因私試以文深器之父為安州
學正每令預堂試諸生皆歎服以為弗如也舉成化辛
丑進士拜禮部主事歷主客員外郎凡四裔朝貢之使

以方物贄見一毫不苟取其或有所求請必條舉典故
辨折開諭使心服而去久之遷廣東提學僉事既至嚴
立教法務欲以身表率而痛抑其浮誕竒險之習在廣
五年列郡之士知所嚮方年甫五十六卒於官端儀居
家孝友動循禮法自其少時已有志泛濫羣籍尚友古
人凡鄉之先輩皆考究而知其邪正賢否郡守青田潘
琴以郡學所祀鄉賢多弗稱典禮乃發策詢於諸生惟
端儀所對策考論精審潘大加歡賞其在禮部署清務

簡尤留意正學而於程朱微言緒論無不究極旨歸平生不作韻語間有議論皆根據義理闕涉世教不規麗藻之工而已嘗考正宋史道學傳進程氏門人呂大臨謂其深潛縝密當不在劉李尹謝游揚之下又以程氏師友淵源朱子已有錄以示後學而朱子門人亦多哲士尚未有表著之者因集黃勉齋以下及私淑有得如真文忠諸公凡若干人為考亭淵源錄又嘗修祠部典故廣東通志畧宋行朝錄皆未脫稿其修道南三先

生遺書朱子事類鄉賢考證莆陽遺事莆陽舊事偶錄

立齋閒錄立齋稿高科考宋氏族譜等書藏於家

洛閩源流

錄 莆陽文獻

忠裕黃後峰先生輩

黃鞏字伯固號後峰莆田人弘治十八年進士推官德安府陞刑部主事歷兵部郎中丁內艱守制家居三年不出戶庭鄉前輩如鄭山齋方松厓陳時周周翠渠咸推重之與為忘年友見素林公尤愛之戊寅春服除將

赴部會武宗北巡人心危疑或沮鞏行鞏題書屋曰石
田茅屋為生太拙鴟夷馬革自許何愚衆不能沮竟北
上補武選正德十四年春上將南巡時寧庶人久蓄逆
謀蕭敬朱寧張銳在司禮錦衣東廠與庶人交通江彬
又握勁兵在上左右中外為憂公卿交疏不聽鞏以事
由彬而言者怵彬威鮮指及乃獨疏六事其畧曰陛下
臨御以來祖宗之紀綱法度一壞於逆瑾再壞於佞倖
又再壞於邊帥至是將蕩然無餘矣天下知有權臣而

不知有陛下寧忤陛下而不敢忤權臣亂本已生禍變
將起竊恐陛下知之晚矣試舉圖治六事於今為最急
者陳之其一曰崇正學臣聞聖人主靜君子慎動陛下
盤遊無度流連忘返者無乃動之過乎伏望陛下高拱
九重凝神定慮屏紛華斥異端遠佞人延故老訪忠良
可以涵養氣質薰陶德性而聖學惟新聖政自舉其二
曰通言路言路者國家之命脈也言路之通塞國家之
治亂係焉竊見近時臣僚奏牘間或言及時政往往匿

不以聞其或事闕權臣則又留中不出而中傷以他事由是雖有安民長策謀國至計無因以達雖有必亂之事不軌之臣陛下無由而知之矣天下烏得而不亂哉伏望陛下廣開言路不責以出位不加以好名如此則忠言日進聰明日廣雖亂臣賊子亦將有所畏而不敢肆矣其三曰正名號陛下近日以來無故自稱為威武大將軍太師鎮國公遠近傳聞莫不驚疑夫陛下自稱為公誰則為陛下者伏望陛下即日削去諸名號以昭

上下之分以明示天下之人庶幾體統以正而朝廷自尊矣其四曰戒遊幸陛下始時遊戲不出大庭馳逐止於南內既而幸宣府幸大同幸太原幸陝西榆林諸處所至費財動衆郡縣騷然至使民間一夫一婦不能相保陛下為民父母何忍使民至此近者復有南巡之命南方之民爭先挈妻子避去者流離奔踣敢怨而不敢言即今江淮之饑父子兄弟相食天時人事如此加以休息愛養尤恐不支况又重以蹙之其何不流而為盜

賊也奸雄窺伺待時而發變生在內則欲歸無路變生在外則望救無及陛下斯時悔之晚矣彼居位大臣用事中官親暱羣小皆欲陛下遠出而後得以擅權自恣乘機為利也其不然則亦袖手旁觀如秦人視越人休戚不相涉也伏望陛下翻然悔悟下哀痛罪己之詔罷南巡撤宣府行宮示不復出發內帑以賑江淮散邊軍以歸卒伍雪既往之謬舉收既失之人心如是則尚可為也其五曰去小人自古小人用事未有不亡國而喪

身者也謹按今之小人竅弄威權貪圖富貴者實繁有徒至於首開邊事以兵為戲使陛下勞天下之力竭四海之財傷百姓之心者則江彬之為也彬本行伍庸流亮狠傲誕無人臣禮臣等但見其有可誅之罪不見其有可賞之功今乃賜以國姓封以伯爵託以心腹付以京營之寄此養亂之道也天下切齒唾罵皆欲食彬之內陛下亦何惜一彬以謝天下哉其六曰建儲貳陛下春秋漸高前星未耀祖宗社稷之託懸懸無所寄方且

遠事遊觀屢犯不測收置義子布滿左右獨不能豫建親賢以承大業臣以為陛下太倒置也伏望陛下將近時羣臣建儲章疏付在廷文武大臣共圖大議即於宗室中遴選親賢一人養於宮中以繫四海之望待他日誕生皇子之後俾其出就外藩實宗社無疆之休也車駕員外郎陸震見公疏即碎已疏草曰願同署名進疏入上怒甚下詔獄鉗校於廷五日三訊杖百餘坐繫逾月除名輦體最羸衆咸謂必死乃死得甦震竟死當是

時海內盛傳其疏歸後杜門著述家素貧客至留飯或
至日中未舉火貸米隣家恬不屑意嘉靖改元名為南
京大理寺丞疏請稽古正學敬天勤民取則堯舜保全
君子辨別小人明年入賀卒於京師年只四十三無子
素翁山齋謀以弟布之子為其後行人張淨峰岳訟其
直節贈大理少卿天啓初謚忠裕鞏嘗曰人生仕宦至
公卿大都三四十年惟立身行道斯千載不朽世之人
願以彼易此何耶鞏沉敏好學雖疾病支離手不釋卷

詩文清粹和婉自成一家所著有後峰文集又有讀書錄山居筆記諸作皆未成書

吾學編

張先生元紳

張元紳莆田人以字行與吳繹思魏時敏諸人結社放情世外性坦易自稱坦齋山人嘗預修八閩通志又與方伯周翠渠編修黃未軒共修郡志郡多韋布獨行之士往林貞肅以名節高一世於時雲蒸躍起不獨冠紳即如處士張元紳劉文暘方在源陳壽徵輩咸鞠躬質行

貞肅居恒數招邀此數人獎引甚至以故更相淬礪以成一時之盛

縣令吳溥夫先生仲珠學派

按吳公亦留心經學者

縣令吳溥夫先生仲珠

吳仲珠字溥夫莆田人少精學業踈於世故登成化乙未進士授義烏知縣以公錢助喪為御史所按嘆曰士何往不自得哉遂拂衣歸家居授徒分晰經傳奧語以

訓後學著有四書詩經講說 道南源委

閩中理學淵源考卷五十三